

普渡戰紀

重訂普法戰紀卷二

南海張宗

良芝軒譯
韜紫詮撰

原本

番禺李光廷恢垣纂

八月四日普王子率第五路第十一路及巴華

厘亞第二路軍攻法之威心勃城

圖作威心畢

是日

辰刻法將都異軍分兩路出第一路爲步兵第
五路爲騎兵兩軍相接鎗炮聲震山谷法軍馳
驟衝突經一時許相持不決城中兵亦登陣助

戰普之巴華厘亞兵首先奮進戰方酣普第五
路軍繼至踴躍助陣法兵不支紛紛退遁甲冑
器械委棄無算城外營壘悉爲普軍所得普將
麾軍齊進蟻緣而登城遂下法軍自城出散走
村落普軍追之乘勝取魯得字一邑其邑瀕河
有大船三十艘法將用以渡禮吳河者亦爲普
有法所調阿耳支理亞兵中有太高種五百人
最稱勇猛至是馳入普軍盡沒於陣是役也兩

國軍數相當惟法之鎗炮相距千五百弓外遽先發放不傷普軍而普國鎗炮發遲而多中法是以敗計炮隕大將都異一員陣擒五百人獲炮數尊普軍陣亡亦不少是爲普攻法第一次大捷也五日普軍前隊逐退法軍六日普將士顛茂士率兵復取沙比勒城普王子并進取孚卜城先是普將命第七軍馳赴蛙尖勃其地在沙比勒西北隅連營屯駐直至沙河法軍已於

五日退出城外較塲較塲甚寬可通孚卜午後
普將連巴便率騎兵先據較塲高阜法兵見之
卽由士卑沙連施炮轟擊沙比勒城形勢峻整
小山大谷攢峙若炮臺誠天設之險也普人由
此進攻法軍無不笑其愚未幾忽有第十四枝
普軍驟至城外卽往南境沙比勒句士卑沙連
相問處與法軍角戰法將富魯實覘知卽收軍
據士卑沙連之山岡巴彥率第三軍向前助戰

普以孤軍獨當兩敵勢不能支普將甘麻欲繞
出士得零攻法軍左翼兵力亦薄屢爲富魯實
所擊退相持至申正兩軍殊死鬪普將班尼球
突陣助戰烈士都統亦率第十四旗普軍第九
旗蛙沙軍出爲犄角時普第五路兵屯於雲得
畢小山普將亞雲士里卡命麾下多耳芝兒移
沙士畢之兵往援指麾甫定而步卒已乘輪車
由紐嘉牽無不踴躍臨陣勇氣百倍戰至申杪

各新兵皆大呼突陣第四十旗步兵第十四隊
騎兵爲右翼以攻其東普兵四隊爲左翼以攻
其西第五枝第十六枝普兵往來游弋於是兩
軍復戰決盪久之大將高斌以軍先據林木法
軍併力圖復卒不可得普第五隊炮軍炮聲連
環不斷別有普軍登土卑沙連小山奮攻法軍
欲從亞士零尖土卑沙連兩處發炮亦爲普第
五隊炮軍擊退頃之法將調集人馬復前力角

時法軍五十二隊別以炮軍守險普軍二十七
隊雖有炮軍而無險可守轉戰逾時遂爲普軍
所敗陣擒法兵二千人迨晚法軍遁走六日辰
刻普軍遂入城所儲糗糧衣履盡爲普有當兩
軍酣戰於士卑沙連村時普將獻乘間襲攻之
計乃遣第十三路兵逕渡沙河順取孚卜城富
魯實聞是消息不敢退兵孚卜由西南隅往亞
聖和地孚卜之地爲普法之交適當塞納河上

流盡處六日普軍旣至城中兵卽出迎自辰至酉併力鏖戰皆殊死鬪至暮法軍力竭全師皆沒西刻普軍入城儲蓄掠取一空是役也地四周皆林木法軍布於平原普軍隱伏樹間普得中法而法不中普又普軍不下十萬法軍僅二萬援兵四至皆爲普軍阻截陷於垓心者不得逸出故致甚敗此普攻法第二次大捷也時援孚卜者爲大將麥馬韓而普王子大軍旣至一

戰敗之故同日復有瓦士之捷當麥馬韓之來
援也見威心勃已敗五日暮普軍圍攻甚急卽
回瓦士據險以守普王子在第三軍大營偵知
之卽調各軍由輪車至命第二路巴華厘亞兵
及第五路普軍屯於廉士卑連多父二處命第
十一路普軍札荷士歷屯營直瀕沙亞河命第
一路巴華厘亞兵屯於林畢士歷騎隊留駐桑
年勃命華特兵往屯於廉麻士威刺其第五軍

前隊先於初五夜往占瓦士東隅高阜是時法軍皆屯於沙亞河南岸環營若聚星法之前隊則營於沙亞河西在瓦士及根士鐵相對處六日味爽兩軍對陣普軍前隊已抵瓦士城下辰刻普第二路巴兵炮聲忽震法軍爭先踴躍發大炮還擊第五路普軍炮隊據東隅岡阜從上下擊爲巴兵聲援已初巴兵爲法礮所攻難於久持其中前列乃第四枝兵繞道馳赴父厘士

威刺與法軍角戰亭午戰方酣普王子忽傳令
第五路止戰巴兵悞會退回蘭尖薩士畢法遂
以全軍注瓦士併力攻第五路普軍勢將不支
適第十一路軍至向前翼助普軍得援兵兵氣
大奮擊法軍稍却第十九第二十隊普軍逕逾
瓦士進攻依薩疏旋及父厘士威刺第九枝第
十枝普軍往來迭進合攻法軍法軍陣整撼之
卒不能動未刻普軍忽新號令命統巴軍第一

路丹將軍留兵二枝於笠山卽督全隊由笠山
往蘭尖薩士畢瓦士交界處接應時第二路巴
軍正戰於蘭尖薩士畢第五路普軍正戰於瓦
士也命第十二路普軍往依薩疏旋攻父厘士
威刺法軍命戈添畢兵偕第十一路軍逕渡沙
亞河命巴甸兵留屯於沙亞畢戰至未正瓦士
依薩疏旋父厘士威刺三處之兵皆大呼角鬪
法軍先據父厘士威刺乘高下擊其勢甚猛時

第一路巴兵雖據哥士多父形勢亦不能扼其
吭旋調第二路巴兵往代波麻兵因波麻往代
瓦得至此藥彈俱罄也而瓦得旣得代又整隊
往蘭尖薩士畢決戰時戈添畢兵已進根士鐵
戰至申刻又調往依士巴以遏法軍退路法兵
萃於父厘士威刺調第一路巴兵擊走之當未
申之交法援兵絡繹至攻第五路第十二路普
軍均不能得志其後第一路巴兵勝於哥士多

父戈添畢兵勝於依巴士於是法軍始比申杪
麥馬韓命拔陣退師以第二枝軍殿後使普軍
不得窮追西初法軍由父厘士威刺退走必治
普軍騎隊之留於桑年勃者已調往根士鐵巴
甸軍屯於梳亞是夕普軍皆不回營枕戈待旦
七日晨追法軍輜重山積共獲炮三十尊墨迭
兒魯士炮六尊帥旗二桿擒法兵四千斬首數
千級普軍所喪亦不下四五千人當戰酣之際

麥馬韓馬陷於坑衆謂大帥已死矣幸有援之者以病卒之車載之七日入南土城守將久之方知乃進糗糒麥馬韓食畢卽乘輪車往沙溫第五軍統兵將軍李拔以兵至兵力尙壯云八月七日戌刻法京聞敗民情洶洶騷動異常八日法后臨朝宣諭臣民曰今日者鄰境不和遽起兵戎原非我國家之福兵交伊始乃有敗北但當益堅心志處是逆境內外和衷張我法幟

或有變亂是與敵通速正典刑罪在不宥尙慎
旃哉毋自貽戚於是法京戒嚴法京諸大臣復
告民曰咨爾衆民我誠告汝茲者敵軍勢盛其
衆如林猝與之遇遂爲所敗然而我軍雄心未
挫爾衆當輔翼勉勵俾其勇敢自奮一鼓而勝
敵夫人心固於金石衆志足爲干城同拒敵軍
何虞不克且勝負亦何常之有如昔者荷蘭之
役西巴士多卜之戰皆先敗而後勝若因此小